

REGIONAL NEWS

HEADLINES:-

1. Mizoram Universal Health Care Scheme (MUHCS) atana inziahlul theih hun naktuk atangin hawn leh a ni dawn.
2. Myanmar chung Salachhuah khua atanga bo Lawngtlai khaw mi Pu Lalramsanga ruang hmuh a nih hnu-ah CYLA in Myanmar ramri an khar dawn.
3. Chief Minister Pu Lalduhoma chuan an sorkarin (First Formulation bikah) Pension 25,038 a chingfel tawh a ti.
4. Assam-a Brahmaputra lui tui hnuai a thianga motor kawng leh rel kawng siamna tur project, sorkar laipuiin a pawm.

<><><>

MUHCS

Mizoram Universal Health Care Scheme (MUHCS) atana inziahlul theih hun chu naktuk atangin hawn leh a ni dawn.

Damloh nikhua a mahni insengso lova inenkawlina atana Mizoram sorkarin a kalpui mek Mizoram Universal Health Care Scheme kal mek chu March ni 31-ah a tawp dawn tak avangin MUHCS thawh hnihna 2.0 atan mipui nawlpui, general beneficiarie te tana inziahlulna hun chu naktuk Thawhtanni atang hian hawn a ni leh dawn a. MUHCS CEO Dr. Lalhriatzuali'n hemi chungchanga mipui hriat tur tul a sawina-ah tuna inziahlulna runpui hawn tur hi April ni 1,2026 atanga hman tan tur a ni dawn thu a tarlang a. Inziahlul hun hi April ni 15 thleng hawn a ni dawn tih a sawi bawk. Inziahlulna hi online-a kalpui hmasak tur a ni a, mahni awmhmun atangin inziahlul theih a ni dawn a, online a inziak lut duh tan <http://muhcs.mizoram.gov.in/> atangin inziahlul theih a ni dawn a ni.

A hmuna kal a inziahlul hun erawh March ni 1 atanga hawn tan tur niin online a inziahlul remchan lohna hmunah chauh a hmuna kala inziahlulna hi kalpui tura ruahman a ni a. Mipui mimir (general beneficiary)-te inziahlul man hi duhthlan tur chi 3 siam a ni a, cheng 2,500 man, cheng 5,000 man leh cheng 10,000 man te a ni ang. Cheng 2,500 a inziaklutte hi an dam lohin general ward-ah admit an ni anga, cheng 5,000 pete chu semi cabin cheng singkhat pete chu cabin-ah an awm thei ang. Sorkar hnathawk, civil pensioner leh AB-PMJY Golden card hmang tu chungkaw tan general beneficiary hnuai hian inziahlul hranpa a ngai ve dawn lo a ni. Inziahlul hun bituk hnulamah, inziahlul theih a nih thin tawh loh avangin mipuite'n ngai pawimawh a, hun bituk chungah inziaklut theuh turin MUHCS CEO Dr. Lalhriatzuali chuan mitin a ngen a ni.

<><><>

ASSEMBLY SESSION

Naktip, Thawhlejni a Assembly budget session tan tur atan ruahmanna peihfel thawkhat a ni.

Assembly inkhawm tan ni, Thawhlejni hian chawhma dar 10 leh a chanve-ah larsap Gen. Vijay Kumar Singh chu House chungah lutin Hnam Hla rimawi tihrik chungin House chungah awmte an ding ang a. Larsap ah House chungah thu sawiin sorkar hnathawh tawh, thawh

mek leh hmabakte a tarlang ang. Larsap-in assembly a chhuahsan hnu hian kalkhawm lehin larsap thusawi chung a lawmthu sawina motion putluh a ni ang a. A tuk, Nilaini-ah sawiho-in a tlang kawm a ni ang. Tangka kum thar (2026-2027) atana Mizoram Budget chu February ni 26-ah Finance changtu Chief Minister Pu Lalduhoma'n a pharh ang a. A kar leh March ni 1 leh ni 2-ah a tlangpui a budget sawihona hun hman a ni ang a. A hnu lamah chuan minister-te'n an department chante enkawl na sum ruahmante House pawmpui tura chhawp chhuakin sawiho chhoh a ni ang a. Assembly inkhawm hi March ni 16 thleng aw h tura duan chhin a ni.

Assembly Secretariat atanga thu dawn danin tun thlengin Assembly rorelna a ngaihtuah tur dan thar siam tur pakhat leh dan dinglai siamthatna tur bill 3 a lut tawh a. Sawi hlawh tak Mizoram State University Act pawm tawh, a dinna hmun sawn a nih dawn avanga siamthat ngai chu thehluh a la ni lo ni a thu dawn a ni. Zawhna hi House chhunga chhan chi (starred question) 1,190 a lut tawh a, ziaka chhan chi (unstarred question) 384 a lut tawh bawk a ni.

<><><>

MISSING

Myanmar chung Salachhuah khua atanga bo Lawngtlai khaw mi Pu Lalramsanga ruang hmuh a nih hnu-ah CYLA chuan Myanmar ramri an khar dawn.

Central Young Lai Association (CYLA) hruaitute'n Akashvani News Aizawl an hrilh danin Pu Lalramsanga ruang hi vawiin tlai lam khan Chhimtuipui leh Salachhuah inkarah hmuh a ni a. He mi chungchang hi sawiho mek a ni chungin ramri a insumdawn tawna hi khar rih an tum thu an sawi a ni. Pu Lalramsanga leh a nau Pu Lalthlamuana te hi an pick-up motor hmangin sumdawng bungrua phurin kar kalta Nilaini khan Salachhuah panin an kal a, khua hi a tuk Ningani khan thlengin hotel pakhat an inngat a. Pu Lalramsanga hi hotel atanga a chhuak chu Ningani zan dar 9 atang khan a awmna chin hriat a ni ta lova. Vawiin tlai khan a ruang hi hmuh a ni ta a ni.

Zirtawpni khan Salachhuah khua a Kawl sumdawng pakhat chuan pick-up chhunga a hmuh ni a a sawi, motor chabi leh driving license chu a nau Pu Lalthlamuana hi a pe a, a u awmna erawh a hriat loh thu a sawi a. Salachhuah-ah hian mobile phone signal a awm loh avangin a u bo chungchang, a chhungte hriattir tur hian Pu Lalthlamuana hi Lawngtlai lamah a inkhalh haw a, CYLA hruaitute hriattir an ni ta a ni.

CYLA hruaitute leh Mara thalai (MTP) general headquarters hruaitute chu nizan dar 7 leh a chanve khan Tuipui Ferry-ah inhmukhawmin he thil thleng chungchang hi an sawiho a. Pu Lalramsanga chanchin hi hriat chhuah ngei ni se tih an rel a. Myanmar ram chhunga awm Rakhine hel pawl Arakan Army-te pawh phone hmanga thu thawnin an awp ram chhunga thilthleng a nih avangin Pu Lalramsanga chanchin hre Chiang tura an mawhphurhna hlen chhuak turin an hriattir tawh a. Vawiin tlai dar 3 thlenga a chanchin hriat a nih loh chuan Lawngtlai leh Siaha district atanga sumdawngte Myanmar luh leh chhuahna kal khan zawng zawng dan a, sumdawng kal vel

zawng zawng dan chah a nih tur thu an lo puang lawk tawh a ni.

<><><>

MBMP CONFERENCE

Mizoram Baptist Mipa Pawl(MBMP) Inkhawmpui S.Vanlaiphai a nghah chu zanin hian a tiak ang.

Tuntumah hian palai 3,450 vel an kal a, palai zing a upa ber chu kum 87 a upa Pu F.Pathanga, Lunglawn a ni. Rorel thu pawm langsar zingah Budget-ah cheng nuai 1 leh sing 4 pawm a ni a, Ruihhlo a inhnamnawihthe chhanchhuah na'n MBMP in hma la rawh se tih a ni a. Christian Hospital Serkawn leh Christian Hospital Lawngtlai pualin vawi 1 feh chhuah ni se an ti a. Kum 2029 a MBMP Inkhawmpui pualin member tinin Rs 50 thawh ni se an ti bawk.Inkhawmpui na'n hian cheng nuai 42 chu Organising Committee in a ruahman a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PENSION

Chief Minister Pu Lalduhoma chuan an sorkar chungin (First Formulation bikah) Pension chinfel tawh zat chu 25,038 a nih thu leh sorkar hmasa hun chung khan pension case chinfel 974 a awm thu social media kaltlangin a tarlang.

Chief Minister chuan Pension hlawh siamthatna (First formulation - Revision of pension/family pension of Pre 2016 pensioners/family pensioners based on 7th Pay Commission) ah hma an lak nasat thu tarlangin, Pensioner leh an chungte tam takin he pension hlawh punna hi an chhawr tawh a ni tih a sawi a. Hetiang taka hma sawn theihna chhan chu Directorate of Local Fund Audit & Pensions thawktute thawhrim vang anih thu tarlangin an chungah lawmthu a sawi a. An zarah an vanglai hun tha sorkar tana hmang raltu pensioner ten an pension pung an lak theih phah a ni, a ti.

<><><>

PRESS TOUR

Press Information Bureau (PIB) Aizawl Mizoram bultumin chanchinbumite tana buatsaih Press tour chu Regional News Unit DDK News Director Pu Nampibou Miranmai-an chuan vawiin chawhma khan PIB Office, Tuikhuahtlang atangin a vailiam.

Pu Nampibou Miranmai chuan thusawiin, rambung khat-a cheng te pawh mahni hnam ziarang te, kalphung hrang hrang te a in an loh thin avangin inhriatpawh tawn a pawimawh hle tih a sawi a, MJA Member kalte pawhin hmun hrang hrang an tlawh turah hlawkna tha tak an hmuhchhuah a, inzirzau nan leh ram tana hlawkna hawn thei tura hmang tura chahin duhsakna a hlan a ni.

PIB Press Tour a kal te hian Jammu & Kashmir ram chung hmun hrang hrang an tlawh dawn a, Press tour a kal tur te hi PIB head of office Aizawl Rajeev Lourembam leh RNU DDK Asst Director Annuj Mallick tenan hruai a, Mizoram Journalist Association President Pu C.Lalrambuatsaiha

hoin member 13 an kal a, ni 7 chhung an thang anga, February ni 22-ah an rawn let ang.

<><><>

CCEA APPROVES

Ramchhunga a hmasa ber tur, Assam-a Brahmaputra lui tui hnuiaia a thianga motor kawng leh rel kawng leiverh siamna tur project chu sorkar laipuiin a pawm. Engineering Procurement Construction (EPC) mode-a thawh tur he project atan hian cheng vbch 18,662 ruahman a ni a, khawvela tui hnuiaia hetiang kawng siam pahnihna tur a ni.

Tui hnuiaia kawng siam tur avang hian Assam khawpui pahnih, Gohpur leh Numaligarh inkar Km 240-a thui chu Km 34-chauh anih phah dawn a, heng khawpui inkar tlan hun chhung darkar 6 ni thin chu minute 20 chauh a ni tawh dawn tihna a ni.

He project hi Assam tan chauh ni lo, Arunachal Pradesh, Nagaland leh hmar chhak state dangte tan pawh a chhenfakawm hle dawn tih Prime Minister Narendra Modi-a'n sawiin hmar chhak pum tan kawng tinrenga hmasawna thlentu a ni dawn a ni, a ti.

<><><>

NIGERIA KILLING

Nigeria ramchhung hmar thlang lama nimin tuka silai keng-ten thingtlang khaw 3 an beihnaah mi 32 an thi. Pawi khawihna hi Niger State-a Borgu biala thleng a ni a, silai kengte hian Tunga-Makeri, Konkosa leh Pissa hnam chenna kuate an bei a, chenna in leh dawr engemawzat an hal bawk a ni.

Nigeria hmar lamah hian tharum thawha chetna a hluar chho nasa hle a, tunhnai lawka Niger thenawm Kwara state-a pawi khawiha chetna thlengah pawh mi 162 an thi a ni.

<><><>